

Apogu Esperanton en la Eŭropa Unio

La Eŭropa Unio (EU) konferencas por ellabori gvidliniojn por plia evoluo. Kadre de la konferenco la eŭropunia civitanaro estas invitita proponi kaj diskuti ideojn, kiamaniere EU evoluu. Tiu civitana debato okazas en reta platformo: <https://futureu.europa.eu/> (*havebla en ĉiuj 24 oficialaj lingvoj de EU, elektu vian lingvon*).

Temas ankaŭ pri lingvopolitikaj demandoj rilate al la lingva reĝimo de EU (komuna lingvo, lingva egalrajteco, instruado de lingvoj en lernejoj ktp.).

Gravas, ke esperantistoj ekapogas por-esperantajn proponojn ...

...ĝis komence de septembro 2021!

Se por-esperantaj proponoj ricevas grandnombrajn apogon en la eŭropunia debata platformo, niaj organizoj (UEA, EEU, landaj asocioj) povos pli sukcespromese dialogi kun reprezentantoj de EU-instancoj, kiam tiuj preparas la decidojn pri realigitaj ideoj.



Mapo : La landoj de la Eŭropa Unio

Via apogo utilas ĝis komence de septembro 2021, ĉar tiam komencos la traktado de civitanaj proponoj.

Bonvolu apogi tiujn proponojn:

- The EU needs improved language learning
(*Proponas grandskalan projekton pri Multlingva Akcelilo en lernejoj*)
<https://futureu.europa.eu/processes/Education/f/36/proposals/23893>
- Esperanto, a common and neutral language, designed to be easy to learn. A new tool for a more united European Union.
(*E-o, komuna kaj neŭtrala lingvo, facile lernebla = nova ilo por pli unuiĝinta EU*)
<https://futureu.europa.eu/processes/OtherIdeas/f/8/proposals/5399>
- Taalonderwijs in Europa
(*Enkonduko de E-o en lernejojn*)
<https://futureu.europa.eu/processes/Education/f/36/proposals/260>
- Official recognition of Esperanto as one of the languages of EU citizens
(*agnosko de E-o kiel unu el la lingvoj de EU-civitanoj*)
<https://futureu.europa.eu/processes/OtherIdeas/f/8/proposals/17955>

Kelkaj konsiloj

Vi ne nur povas apogi por-esperantan proponon (nepre faru tion!): vi povas ankaŭ komenti tiajn proponojn. Uzu tiun eblecon saĝe, indas atenti kelkajn konsilojn:

- Skribu laŭeble ne tro da komentoj. Nia celgrupo, la membroj de la civitanaj paneloj kiuj pritraktos, diskutos kaj decidos pri proponoj, devos okupiĝi pri centoj da proponoj. Ju pli konciza kaj trafa via komento, des pli pozitive ĝi influos la akcepton de la propono.
- Pripensu ke la celgrupo de niaj proponoj kaj komentoj ne estas niaj samideanoj. Ne skribu en Esperanto!
- Ne donu lingvajn aŭ historiajn lecionojn pri nia lingvo. Sufiĉas doni ligilon al bona fonto por scivolemaj ne-esperantistoj.

Teknikaĵoj

Por apogi por-esperantajn proponojn necesas registriĝi. Jen konciza priskribo.

Je via unua aliro al la retejo de la civitana platformo <https://futureu.europa.eu>:

- elektu vian lingvon el la 24 oficialaj lingvoj de EU (ne, bedaŭrinde Esperanto ne jam estas inter ili)
- alklaku la ligilon „Ensaluti“ dekstre de la eŭropunia flago
- en la paĝo de „EU Login“ alklaku „Krei novan uzantkonton“
- plenigu ĉiujn kampojn, inkluzive la „kodon“. Necesas entajpi la „kodon“, la signojn (literojn kaj ciferojn) afiŝitajn en la kaptila bildo („captcha“). Se tio malfacile legeblas, alklaku la trilateran sagon > supra la bildo (sub „entajpu la kodon“): sintetika voĉo laŭtlegas la afiŝitan kodon. Aŭ alklaku la duoblan, kurbitan sagon por afiŝi novan kaptilan bildon, espereble pli bone distingeblan. Foje pluraj provoj estas necesaj, ne malkuraĝiĝu! Atento: **uskleco gravas** je la kodo.
- Laste, alklaku la plej malsupran kampon „Krei novan uzantkonton“.

Vi ricevos mesaĝon al la retpoŝtadreso, kiun vi ĵus registris. Atendu tiun mesaĝon kaj alklaku la ligilon en ĝi. Vi nun devas elekti vian pasvorton. Atentu pri la kondiĉoj, kiujn la pasvorto nepre plenumu: longeco almenaŭ 10 signoj, kaj ĝi devas ankaŭ plenumi almenaŭ tri el la kvar afiŝitaj kondiĉoj.

Je via unua eniro vi vidos demandaron. Vi ne devas respondi la demandojn, simple alklaku, ke vi ne deziras respondi ilin. Aŭ respondu nur kelkajn, laŭ via deziro.

Kaze de teknikaj problemoj skribu al Klaus Leith: KDL@gmx.eu

Pliaj informoj?

Se interesas vin la politika fono de la eŭropunia „Konferenco pri la estonteco de Eŭropo”, utila startpunkto estas la [esperantlingva wikipedia artikolo](#).

Se vi interesiĝas pri detaloj de la maniero, kiel la esperantistaro partoprenas la civitanan konsulton kadre de tiu konferenco, sekvu la informojn en la diskutgrupoj [uea-membroj](#) kaj [informa reto pri esperanto](#).

